

鞏昌府志卷之六

古蹟

卦臺

在秦州北三十里三陽川伏羲畫卦處也相傳臺有遺跡着雪甚真

媧皇疑跡

秦州有媧皇廟今廢相傳爲女媧生處按帝系譜女媧風姓與伏羲同母生然不著處所秦州之傳豈據此耶陵又何以在關河口耶姑存疑

鞏昌府志

卷六

一

軒轅谷

在上邽城東七十里軒帝生處也或謂帝生壽丘及攷水經酈道元註謂帝生於天水軒轅谷郭璞山海經註亦謂帝居軒轅之西陵氏女又謂帝居軒轅之國在宿山北實地又謂軒谷洵水所出與黑水隣又謂岷山乃天水東由是觀之帝之生軒谷者真矣皇甫爲生壽丘者無攷

朱圍山

在伏羗縣西三十里禹導渭所經處也書曰導渭自鳥鼠同穴西傾朱圉至於太華卽此山

### 姜里城

在文縣天牢山相傳爲紂拘文王處而彰德府湯陰縣亦有姜里城竊意紂都朝歌卽今衛輝府湯陰去衛輝不遠其爲姜里的矣而文縣者何以稱焉以爲誣也縣何以名文山何以名天牢古何以有跡今何以有廟有祀豈文爲西伯紂初拘於此而繼逮之湯陰耶將別有故曾拘此耶今皆不可

攷矣姑以存疑

### 首陽山

在郡西九十里夷齊避周采薇處此其真跡舊有夷齊廟二賢塚香火田近爲鄰民侵沒郡守紀公元廉其侵田新其祠宇立有碑記

### 雲下田

輿地紀勝云隴西有耕天村其田曰雲下田又古諺云郎樞女樞十馬九駒安陽大角十牛九犢謂其地宜于畜牧也

秦亭

在清水縣東三十里亭樂山上有秦亭遺跡卽子始封處或以爲隴州秦城者非是

秦祖故里

在秦州境祖孔門弟子唐封少梁伯宋加封鄆城侯

壤駟赤故里

在秦州境赤孔門弟子唐封北徽伯宋加封上邽侯

鞏昌府志

卷六

三

石作蜀故里

在秦州境作蜀孔門弟子唐封石邑伯宋加封成紀侯

長城

在郡北境一百里烏隆溝北山有遺跡驀山越澗其土獨黑若烏隴蜿蜒俗名長城嶺西起臨洮郡北至遼東延袤萬餘里古今一大保障也

弓門古城

在清水縣北七十里秦所築以備北邊者昭王時

秦方有事東諸侯山後部落乘虛入掠乃築城上  
邽命白起鎮之宋紹聖中兵馬都監魏誠建祀鑒  
碑今祠廢碑存

李廣墳

在秦州南里許石馬坪漢李廣葬此傍有李廣宅  
今廢爲壇

營平故里

在清水縣東二十里古上邽城內今不知處所第  
侯文武兼資爲漢名將第一而生於郡屬山川之

光也志以旌賢故其里不可不攷

增竈留跡

虞詡增竈韜幹家類豔言之其跡在武都界中今  
世遠跡湮地固在焉

上邽

今爲清水縣故城在集翅山下趙壯侯墓在焉按  
隴西諸郡縣自天水南安之外惟上邽建置最古  
蓋自秦武公逐邽戎置縣歷漢唐皆著名隴上

街亭

在秦州東南七十里今名街子口漢丞相亮伐魏時參軍馬謖與魏將張郃戰失利處也初魏以昭烈既崩數載寂然是以略無備預卒聞亮出遠近震驚天水南安安定皆舉軍應亮關中響震勢且長驅此興復一大機括也而謖違亮節度離水上山郃絕其汲道大破之以致阻喪令魏得有備故六出無功此古今所爲扼腕者其跡在此

### 諸葛堡

在西和縣西北七十里之長道鎮漢水遶其下中

突起一小山若臺武侯伐魏時出兵處也

### 木門

在秦州西南一百二十里漢丞相亮射死魏將張郃處也

### 牛頭山

在清水縣西南一百二十里姜維聞司馬懿誅曹爽乘空欲圖長安依趨山築二城使苟安李欽守之率羗人逼三郡郭淮使天水刺史陳泰斷其運道將士窘困分糧併日維引軍救之出上邽相持

牛頭山淮絕其歸路進軍洮陽維還安等降魏卽此地

段谷

水名在清水縣東南山下鄧艾敗姜維處也維自狄道引還駐軍鍾提魏人以其力竭不能再舉安西將軍鄧艾曰維必來彼有乘勝之勢我有虛弱之名一也彼上下相習我將易兵新二也彼以船行我以陸行三也狄道隴西南安祁山各當置戍彼聚我分四也因糧於羗不煩轉輸五也其來必

矣維果復出祁山艾既有備戰於段谷大破之卽此地

西平故里

在洮州舊臨潭縣唐西平忠武王李晟生處李氏世以武力名隴西晟以備羗居臨潭因家焉舊有御製碑今失所在

仙人關

在徽州西北七十里宋宣撫吳玠破金兵處也蓋宋自五路之敗金乘勝長驅目已無蜀微玠孰衛

南服

附

隗囂連城

在秦州北郭外里許之鳳凰山上後爲寺杜詩云  
秦州城北寺傳是隗囂宮

漢趙戰跡

一在上邽一在仇池一在隴城晉咸寧中劉淵劉  
聰相繼而起國號漢至劉曜改漢爲趙西圖隴右  
收陽氏於仇池滅南陽於上邽斬陳安於隴城三

鞏昌府志

卷六

七

處俱有戰場惟隴城有壯士川餘皆失攷至敗張  
駿收河南地則其跡又在洮西矣

臨渭氏跡

在上邽西成紀東南渭水之陰蒲氏世居其地洪  
生而驍武多權略晉亂招士得千餘人保隴山石  
季龍攻拔上邽洪歸季龍季龍卒洪歸晉爲征北  
大將軍都督河北諸軍事廣川郡公應讖改姓爲  
苻僭稱三秦王貳於晉麻秋鳩洪季子健誅秋僭  
號爲大秦至堅弒主自立任王猛兵威所至望風

降附中原郡縣十有其八矣

赤亭羗跡

在隴西縣西三十里羗酋姚弋仲所居處也弋仲之先世居其地至弋仲生而英毅非常專以收恤爲務永嘉之亂東徙榆眉戎夏襁屨從之者數萬劉曜平隴以弋仲爲平西將軍石勒克上邽以弋仲爲六部大都督平襄縣公與石虎受遺輔政勒死石虎廢弘自立弋仲稱疾不賀虎累召乃至正色謂虎曰柰何把臂受托而反奪之乎虎憚而不

責至虎殺世子以憂病趙末梁犢叛虎兵於滎陽虎懼召弋仲仲將兵至數虎曰兒死來愁耶乃至病兒小時不使好人教道令相殺兒自有過責其下人太甚故反耳汝病久所立兒小當宜憂此不煩憂賊也第看老羗破之虎賜以鎧馬不辭以出遂滅梁犢進封西平郡公石亡上表降晉謂諸子曰吾本以晉室大亂石氏待吾厚故討賊以報其德今石氏已滅汝曹便歸晉母妄有圖卒時年七十三葬天水冀縣



仇池故城

在西和縣之南成縣之北相去各百里戰國時爲白馬氏國晉楊難當因山築城三世據此後魏于此置仇池郡按仇池城四面陡絕壁立千仞石角外向自然有樓櫓雉堞之狀惟有一門可通絕頂平地方二十餘里有田百頃泉十九眼自下而上羊腸盤道三十六迴唐杜甫仇池詩云萬古仇池穴潛通小有天近接西南境長懷十九泉

南鮮卑跡

南鮮卑乞伏氏也乞伏氏世居隴西天水之苑川後司繁降苻堅堅以爲南單于鎮西將軍鎮勇士川司繁卒國仁乘苻堅之亂自領秦州牧收南安羌并其衆苻登拜國仁持節大都督苑川王至子乾歸別號西秦建立朝宁置師傅官僚

襄武故城

在隴西東十五里漢所建也漢護羌校尉温序行部爲隗囂將荀宇所拘銜鬚自刎于此

天水古郡

在秦州東南一里秦時古城

河池廢縣

在徽州東南十五里唐城也

武都紫泥

在階州秦漢皆常取用今莫詳其處

勇士故城

在秦安縣近郊苻秦時創置

廣吳廢縣

在寧遠縣西三十里宋置

鞏昌府志

卷六

十

冀城故趾

在伏羗縣南五十里秦武公置

安遠廢縣

在通渭縣北六十里今爲安遠鎮

白石古戍

在西和縣北三里唐宣宗時築以防羗後改爲縣

臨洮舊治

唐宣宗時築後以去洮遠改建洮水之上遺趾存

天嘉古郡

在禮縣東四十里秦武公所置

### 大潭廢縣

在禮縣南八十里魏置潭水郡宋改爲大潭縣今爲鎮

### 吳郁宅

在兩當縣南嘉陵江上杜工部有吳侍御江上宅

詩

### 杜工部草堂

一在秦州東柯峪一在成縣飛龍峽口蓋工部寓

秦時東柯過冬栗亭過夏以建草堂

### 秦嘉村

在通渭縣渭城里嘉爲郡掾其妻徐淑歸寧于家

贈荅有詩

### 陰平古道

鄧艾入蜀時所開路也在今文縣南棧道縈紆江流其下爲秦蜀之阨

### 通西古城

在安定縣南四十里宋西市貿馬之處也

西寧古城

在會寧縣東三十里宋靖康中築址存

臨潭廢縣

在洮州西七十里李西平王生處其城至今以李

顯名

古會州

在會寧北境黃河上今改爲靖遠衛